

芳洲文集

芳洲文集卷之四

泰和陳循著

序

送禮部侍郎錢公致事詩序

禮部侍郎吉水錢公為翰林學士兼經筵官時兩引

年上章乞致事皆不見許未幾禮部侍郎命下公上

章大意謂以臣大馬之齒且病方謂求退之晚顧敢復

有所受願辭侍郎之職仍守舊官不許公不得已就任

逾年以疾在告者八越月復自其家遣人詣闕上章

其情懇其言切朝廷不能奪遂聽以本官致事余嘗

竊謂自古材智之士非明進退之義知止足之道者不能決求去於眷念之朝自古英明之君非達賢否之機重庶靖之節者不能遂求去於衰邁之士宋龐莊敏公藉請老於朝或謂公曰公未甚衰主上注意方厚何遽引去之堅公曰必待筋力不支明主厭棄乃去豈知止足之謂表疏屢上仁宗竟不能奪聽以太子太保致事於予若龐莊敏可謂知止足之士矣而宋仁宗豈非重庶靖之君哉仰惟聖明在上真三代之英主非宋仁宗可比而謂錢公非龐莊敏之流則固有不可也夫然後知君臣不獨相遇之難而其請於上者無所歉予於

下者無所吝顧豈可易得哉余嘗求公所以得乎此者
非一公以永樂辛卯進士歷官翰林檢討侍讀所職
三朝實錄之事兩遷學士兼經筵官迄今三十有七
年矣舊孰如之居官未嘗一事有媿於已未嘗一言有
徇乎人屢為鄉試會試考官所取諸生皆稱得人其所
以裨於當世者可謂厚矣其所以得今日之歸榮者孰
非由於此哉公嘗兩以翰林之職蒙推恩於其親尊
府官贈至翰林侍讀學士奉直大夫母贈至宜人又今
春秋七十有五心體清明康健後生者所不及殆駸駸
於耄期者也則豈獨得於人而已於其得天者又孰之

能禦耶書曰作善降之百祥詩曰樂只君子遐不眉壽
公其有焉余辱同官於公三十餘年故於其去此也不
能忘情為之序以道之贈公詩者繫于左方

送左布政使張君赴山西序

十數年來江右憲使剛而廉閭疏而磊落者吾見一人
焉臨章石君璞也藩省大叅寬而栗雍容而文雅者吾
亦見一人焉山陰張君翰英也斯二君者江右之民之
所仰望而二君於江右之民既去亦恒不能忘於懷也
民恒患不得良有司在上有司亦恒患不得民之心若
二君於江右之民謂其非深相得可乎在數年前朝

廷簡石為山西左布政使石君因移所以惠江右者惠
山西矣今年石君以考績至京師 朝廷擢為工部尚
書而擢張君為左布政使以補其闕得非亦欲張君移
其所以惠江右者惠山西耶惟石君能移其所以惠江
右者惠山西故今得遷尚書以移惠於四方張君誠亦
以其所以惠江右者如石君之移惠山西安知他日不
如石君移其所以惠山西者惠四方乎此理之所必至
不待智者而後知也嘗觀士無其善則已苟有善焉譬
之寶物雖欲掩之有不可者觀張君可見矣先是四方
闕布政使者再廷臣咸以其名應薦皆未果遂至是始

得以代石君是知一定之分出於天者有非人之所能為也蓋張君在永樂乙未之春以鄉貢授章丘儒學訓導佐教之外嘗署章丘鄒平兩縣公事皆得其士民心九載被擢吏科給事中蒞職之餘以能事奉使往山東淞江董理要務具有成績又以剛廉正直預舉詢察庶官之不律者所指三十二人皆見黜罰遂得推恩以其官品封贈父母既而以母喪去起復陞雲南布政司叅議未幾再陞江西叅政居官務持大體不屑細故凡百關涉為國為民之大多所建明而施諸行事焉則其所以有今日之榮者孰非由於此哉抑聞張氏之先有樂

善務義號聰雞老士曰九臯者君大父也有為山東叅
政於洪武中曰九容有為宜春教諭於永樂中曰九功
有為令唐府長史曰某者則又皆其諸大父也為善之
所從來者遠將其食報不但今日之榮而已在所以培
植於後者何如於其赴山西也通政司左通政金華龔
君全安以余素知張君者也相率在京故舊請為序以
贈行故為之書以取他日之徵

送劉誠之赴廣東按察僉事序

四十年前在鄉邑時士有未游學校而以讀書通經可
應鄉闈試者恒十數輩每遇大比之歲輒與學校之士

偕應試於所司有劉象賢甫者尤傑然在其流輩中余
嘗亦自學校濫預應鄉闈試因得與象賢甫邂逅其間
有斯文之雅矣旣數年余始出而仕于朝又二十餘
年余甫還鄉里而象賢甫則已物故久矣獨見其子曰
孚字誠之者表然於鄉校中為弟子負之冠時余友諸
暨王孟堅以翰林修撰為按察僉事督學至泰和間過
余言及誠之曰此貴邑諸生中巨擘也余因喜曰象賢
甫雖未遇有子如此其大遇有在矣明年誠之果以易
經領薦於鄉又明年試禮部遂舉施槃榜第二甲進士
踰年擢刑科給事中由此觀之孟堅巨擘之譽區區大

遇之期夫豈為虛語哉於乎君子讀書勵行不食報嘗
時必得効於來世觀於象賢甫足徵矣歲之戊辰四方
奏闕藩憲長貳 聖天子 登其人於大臣於是刑部
尚書淮南金公都察院右都御史姑蘇陳公大理卿姑
蘇俞公以誠之掌科事克秉勤慎相與共薦其名於
朝廷命下得授廣東按察僉事夫士之仕所以能致光
顯盛大於當時者固本於其父兄之教而亦由能自力
以成其志之所尚也若誠之者非能自力而何可謂之
賢子矣於其赴廣東也鄉邑之仕京師者以余知其父
子謂宜序以贈行故余云然若由是而益勉以進於遠

且大則又在於誠之之用心何如耳

送知府夏君仲昭赴瑞州府序

夏君名景余舉進士同年友也初君舉進士時其姓名為朱昶昶字從日永聲自有聲韻以來日永二字並列為昶自君名在進士之列朝廷又重進士之科君又以文翰選將改進士為翰林庶吉士深有儲養待用之意太宗皇帝一見其名以日與永並列顧侍臣曰夫日運於萬物之上者也顧可與其他並列耶特命升日字於永字之上以為君名當時固皆以為聖知卓冠百王而又以為君之遭遇恩寵足以光輝於百世也

何其偉歟既而君又請弛其所冒姓而復其祖之姓為
夏人以是益重君雖然君之所足重者又不獨在是而
已矣溫雅篤實而行足以敦薄閭疏穎敏而才足以動
人自庶吉士擢為中書舍人轉為吏部主事官雖久而
不進而其文翰之美上有以裨國家史傳之載聖賢
經訓之傳下有以起公卿大夫之慕賢士君子之譽蓋
幾數十年矣由此觀之君子之仕不在乎秩之崇而在
乎有賢譽之為貴也秩苟崇矣而或勲績不著賢譽不
聞君子有不貴焉若夏君者不徒著勲績於一時而能
播賢譽於永久其過於崇秩者遠矣雖然有賢譽者未

有不躋於崇秩也孟子所謂修天爵而人爵從之是已
歲之戊辰君以知己之薦蒙 恩擢江西瑞州府知府
或為夏君少之余曰不然君子以得効用於國施惠於
民為足以滿所願君既得効用於 國家而有賢譽久
矣茲又獲施惠於千里之郡使誠得譽如前日之得於
公卿大夫賢士君子其為足以滿其所願夫孰之能禦
哉在自勉何如耳於其赴瑞州也大理卿俞君仕朝敦
同年之好相率吏部侍郎曹君子宜某官某某謂余宜
為序以贈行余又知夏君之深者故為序以塞責如右

送訓導胡亶明赴壽昌縣序

亶明吾泰和西北鄉義禾里胡氏也胡氏為鄉舊族其人多業詩書居者往往以授徒於里閭或出而游庠序則亦有以取科第於當時又或以舉明經起佐四方儒學教者要皆篤實勵行之士而非輕浮淺薄務苟行以夸耀於一時者所可倫也四十年前余在鄉校友其一人曰雅字興詩者孳孳問學不懈晨暮與人未嘗出一戲言其後舉永樂四年林環榜進士歸榮於鄉以卒蓋亶明伯父也近數年前又得其三人曰子楫者端重捐介余嘗聘為塾賓則又興詩之諸父也其次有曰莊與亶明亦皆秀偉而所謂篤實勵行或過之三人者俱

以舉明經相繼起為學宣明初得順天府寶坻縣儒學訓導寶坻距京城百餘里仕宦於其間者一有譽毀朝起則夕聞之不爽毫髮宣明至不踰月課誨諸生諸生躍然以喜如履塞得通道有歸告其父兄者曰得胡先生寶坻前此所未有也未幾宣明以母喪去則又相與感曰得胡先生而遽失之豈造物欲以困吾徒耶其見重於諸生如此歲之戊戌宣明以服闕至京師改嚴州府之壽昌縣儒學將行其母姨夫雲南布政司叅政嚴七正走告余曰外姪宣明可與進於善者願先生有以造就之夫士所以進於德與學者以其有所取以成也

孔子論其弟子宓不齊以謂魯無君子者斯焉取斯今
亶明諸父祖若此有以取於內矣而又有嚴叅政為其
毋黨之姻所以師友於其外者不為無人亶明誠能取
以自勵則德與學何患其不進哉故余於嚴之請書之
以告亶明詩曰伐柯伐柯其則不遠亶明其尚以之

送知府李君克明之任蘇州府序

姑蘇東南第一大郡其民與賦之庶且富視環數千里
之藩方大者幾與之等次者或及其半又地廣而人稀
田下而力作不逮者恒數倍其數焉然則姑蘇以民賦
稱大郡豈直為東南第一而已耶且復臨以兵衛其間

農戍錯處工商交集肆奸偽以致爭競者往往一日千
出而皆有仰於所司焉十數年來 朝廷任官徃蒞其
事必命廷臣共舉所知以為之守與凡守大郡者並賜
之以 璽書使得便宜進退其屬之良否者然後人知
其不可犯皆勉於良而革其或不良以共興起於治理
焉正統七年之冬姑蘇守復闕明年春特 詔選如前
日得大理正四川李君克明 命賜璽書如故於乎自
聖天子嗣位以來命守衆矣而如李君得 賜璽書者
蓋無幾也可不謂之榮且重哉於其赴姑蘇也其鄉郡
士君子皆推戶部主事毛鳳泰觀米求余文為贈李君

余舉進士同年友也其所以有今日之遷擢者余知之
矣蓋君自進士授大理評事即起才譽於縉紳間數年
不待銓衡之課尋常歲月之累遂舉陞大理正居官奉
法一以公廉為本寬恕為用嘗曰刑獄之事苟如䟽流
而下激湍而上將見水之下上終歲不止雖日䟽之激
之其能免於患乎必如池沼之瀦皆得其平則自無覆
溺之虞也聞者以為推是心以為治無不得其理者而
况於刑獄乎今君以理刑獄之心臨民雖民與賦之庶
且富倍於藩方雖奸與偽之致爭競關乎農戍工賈殆
有不難理者君誠為之則自郡守而進任藩方自藩方

而入補卿佐皆於此乎肇也故於序贈行也致愛願之意如此云

送歐陽副使之任四川按察司序

吾邑自永樂紀元來仕宦最顯且盛而出於一家者莫衆於歐陽氏監察御史雖十餘人而歐陽氏獨二人兄和及其從姪廣洙也自御史與僉事歲滿遷按察副使者邑中才見四人而歐陽氏二人皆預又歐陽氏官卽署者四人而廣洙之從兄廣哲獨以主事舉遷歷河南淞江兩按察僉事其他長貳州縣之教於四方者尤彬彬焉不謂仕宦出於一家者莫衆於歐陽氏乎然不徒

衆而已其顯於臺憲者有莫之或過也廣洙永樂甲辰
邢寬榜進士首擢監察御史往任南京數年大起才譽
於倫輩間旣而以丁艱去服闋調北京四川道廣洙質
偉而志高材美而行謹常奉 命按外服務振風裁不
事苛刻是以善者愛之而不善者恒恐退避之不深焉
暨竣事還都憲事者以為長是道非歐陽不可遂不復
令奉使於外凡有干憲紀來自四川者廣洙未嘗不悉
其實析之未嘗不得其理而處之未嘗不得其當焉歲
之癸亥四方奏闕藩憲長貳復令大臣各薦所知於是
得二人於監察御史之中廣洙其一人也以為四川按

察副使推夫所以銓注之意豈非以其嘗悉一道之實而析之處之者得其條理至當有不待於用力也哉夫君子之於器苟利於用恒不忍其去手設可大用於他雖欲不忍其去安得而固留也若都憲於廣洙何異不忍利器之去手哉而終不能留者亦理所必至也君子當以天下之心而處天下之事又何必論所用在此在彼為之去留也耶此廣洙之所以不能久於御史而不遷也於其赴四川也刑部劉郎中廣衡於廣洙有先世好且同年舉進士而交莫逆相率素親厚者屬又為贈故述余所知者以為言焉

壽太孺人張母七十詩序

太孺人倪氏今翰林侍讀學士姑蘇張益士謙之母也
正統十三年歲周七十九月二十三日為其初度之辰
是年士謙以翰林修撰遷侍讀學士京師名鄉大夫方
為士謙慶喜而士謙曰益之所以至今日者皆賴母太
孺人守節殷勤教育之所致也茲荷 聖朝大恩益之
感且喜者固無量矣然益之私喜尤盛焉太孺人當春
秋七十之年孔子所謂一則以喜益固以之使其聞益
獲拜 恩命至此豈不自慶其私以為他日得以託孤
之功見先人於地下其喜為何如哉得親之喜如此此

益之私喜所為尤盛也既而起告其座客曰諸君以為
為益慶喜與為母太孺人慶喜也孰愈為益喜得進官
與為益母太孺人喜得進壽也孰大於是名卿大夫縉
紳之士躍然相與賦詩以授士謙俾寓歸南京為太孺
人壽士謙以余其舉進士同年且屢同官授簡首請為
序蓋士謙自少孤太孺人守節五十年成之已嘗蒙
詔旌表其門復自士謙推恩其先君子既贈中書舍
人太孺人亦得授今封世之至榮至幸固莫有大於此
而壽又躋七十方來之慶尚未可量於乎此豈聲音笑
貌之所能為也哉譬之太山之松根盤於地其所發之

枝柯則雖凌以霜雪力愈至而操愈堅吾以此比太孺人之居孀其所出之琥珀則凡用於冠佩愈久而光愈顯吾以是比太孺人之有子其高立乎霄漢則雖更歲月之久而長存承雨露之繁而益茂吾又以比太孺人之有壽吾以是三者比太孺人之平生要之非其積善以為之本不飡及也

韓母張氏貞節詩序

姑蘇有韓母張氏者前御醫同郡文伯之子也年二十歸太醫院判公達長子伯濟生子曰來未幾而伯濟嬰重病病革顧張欲有所言而未能出諸口張喻其意流

涕語伯濟曰脫遇不幸妾有秉一而已舍此他日何以相見於地下乎言訖伯濟首肯數四遂卒卒旣數月子來亦殤舅姑憫其早寡且獨使所親微諷以移天事窺其意張引韓希孟事為喻且曰彼遭變故尚不為之或二矧有賢達舅姑在上內承先世之高明外膺當朝之寵遇顧不能存一寡獨之媳哉寧死不願聞有此也蓋公達為宋魏國忠獻王十二世孫而為我太宗文皇帝之所親信任使過於其他賢大夫士此張之所為云然也旣而公達命其仲子之子曰襄為伯濟後俾養張以終身張撫育教誨之如其所生襄賴以有成立而

孝養於張者亦靡不盡其心張孀居四十年凜然冰蘖之操而事老姑如事其母姑嘗嘆且嗟曰吾不幸失長子而幸得賢冢婦孝敬如此吾雖老何患乎正統十年有司以其守節事 聞詔旌表其門曰韓伯濟妻張氏

貞節之門旣而京師賢大夫士嘗知公達且聞名者喜其有賢冢婦能盡節孝足為風化之助相與詠歌其美俾傳播於久遠亦仁人君子樂善之意也詩成襄因余舉進士同年友兄大理寺卿俞公仕朝來屬為序公其郡人知其事信不誣宜為序也嗟乎節義人之大行非其心之中正有所不能全也能全乎此然後子不愧乎

為人臣女不愧乎為人婦而能有譽於天下後世矣如是而不為賢大夫士之所詠歌未之有也韓氏之後其尚寶此以著母節孝之德於無窮哉

送王希誠省親還泰和序

希誠今太子太保吏部尚書王公之中子也公之子長希稷太學博士次希德希誠希敬希某凡五人公與夫人皆春秋躋七袞之上時人比之燕山竇氏靈椿一株老丹桂五枝芳余嘗論之公仕於朝四十七年官階一品固有過於禹鈞而希稷兄弟雖不必皆顯如儼儀兄弟之揚芳而其所以芳者則固自有在也譬之鮮花

艷卉日爭妍於名園麗囿之間人固挹其芳也而幽蘭
白芷之芬馥其見愛於人也尤甚又如精金美玉用致
飾於籩豆簠簋之上固仰其貴也而收藏掩襲之秘固
其見重於世也益深是以君子之於善也求其有諸已
而已矣善苟實有諸已不必顯不必不顯而人之挹其
芳仰其貴與夫如幽蘭白芷之芬馥精金美玉之秘固
其見愛於人與見重於世一也夫君子之為善莫有先
於孝弟忠信孝以奉其父母弟以處其伯仲而忠信者
又所以存諸身而施於人者也能是四者善之本有立
矣希誠尊府在朝獨母夫人居兄弟四人互相往

來以供定省率二三歲一更懽然親愛怡然友恭其視
竇氏之芳固不相下而於天倫之樂殆有非其所同亦
不可知歲之庚午希德來自其家而希誠又以其尊府
之命歸省於鄉且戀戀有不忍去違之意於其別也余
重其有孝弟忠信之美故為書以贈之使凡鄉之子弟
視之皆知有所企而及焉

送劉給事中士拯序

士拯予友也家居同里閨而同來京師舉進士皆職侍
近數年之相與莫逆也士拯有父母俱康強無恙而兄
弟又森然其多子不能及且予不得一朝去所職守今

士拯以兵科給事中按交趾獨得假道過家以與六親
故舊一相懽聚又豈予所能及者哉士拯之尊府仲高
君樂善守靜而與家兄日相往還於士拯歸必懽然欣
洽矣於此又可想見家兄之不見予能不測然於其中
哉然則不獨予羨士拯而家兄又當羨仲高君也士拯
質美志銳居官日有能名間奉 聖書巡撫山東黜罰
貪懦多稱 上旨則今選近臣以廉恤遠方舍斯人其
誰哉交趾荒服前代背服於中國者不常賴今 天子
仁聖內附始定而於是為政者可不究其方哉古有之
曰遠者寬而撫之又曰刑新國用輕典士拯此行其必

能達此意而亦上之意也故於其別舉以為言

送彭學孚還廬陵序

吾鄉郡之俗最為可貴者士務通經學古而重廉恥民雖力於農賈然尚氣節而輕貨利蓋有古者之遺風焉十數年來舊習日弊而俗日趨於陋固通經學古也而或行不足稱固尚氣節也而或廢農賈以爭訟於官府往往瀆貨棄義而不覺其為非蔑視太守縣令若無造謁禁闥如履邑庭勢不至於併喪不止而所謂吾鄉郡之俗最可貴者不幾於泯矣乎此予之所以日切於心而未如之何也賴今天子仁聖咸與之維新矣華

其弊陋而復向之寂可貴者正此時也夫俗不復其舊而或以陷於罪在今日有不復假借者顧曷為而謹厚不務而必欲蹈於非以速戾於厥躬此予之所不可曉也學孚來遊京師將歸其鄉其姻家翰林編修周功叙屬贈以言予因舉所欲言於鄉郡者為詞異其歸以相告使有勸也使予之所以為鄉郡勸者或行由是而人知所守以遠禍豈獨予之意愜亦學孚之忠厚事也學孚之所以為鄉郡榮者豈不在此何必得予言而後為榮也學孚姓彭宋戶部侍郎諱思永之後鄉郡之名族也言之見聽於人必易故為之贅吾聞學孚父母俱存

兄弟無故其慶之在於家庭者蓋未艾也述其天倫之樂又有諸君子之歌詠在焉因書此以弁其首簡

拙齋詩序

西昌有謙謹篤實之士曰王存性者自號其所居曰拙齋然求其拙則未之聞見焉蓋存性甫讀書命儒而旁通老佛氏之學以攻駢四儷六之文卓卓有聲於鄉邑間鄉邑無問遠近有事於佛老氏之教與凡禮之大者輒詣求焉其戶之屨常滿而存性甫徃徃操紙立應未嘗宿諾亦未嘗不忻忻然得所欲而去且存性甫於此特推其餘力耳而其所專則蓋在於講學授業恒聚徒

至數十人點檢終日忘倦至於理家亦未嘗以廢也予
知存性甫者如此則謂未之聞見其拙非耶拙者巧之
反也志道據德依仁游藝此君子所巧而小人拙焉矯
枉作偽飾非文過此小人所巧而君子拙焉以君子所
巧則存性甫予未之聞見其拙也以小人所巧則存性
甫固知其為大拙者矣人知宜巧而不宜拙不知小人
所巧不可有君子所巧不可無也周子有言巧者賊拙
者德巧者凶拙者吉則謂是矣士君子能賦者為存性
甫詠其拙齋而予書此以為之序且以警凶賊之巧云

送魏驛丞序

今聖天子即位改元之初天下安寧民物康阜群公超
事百廢具興先是監察御史陳憲按臨泰和以分司久
頽毀無以稱人瞻仰而適民有訴越分作居者御史即
覈實而撤之以建分司前廳命浩溪驛丞魏氏子忠董
其事子忠為人疏達爽朗居官濟以勤敏凡事有涉於
公義者為之克盡其心而其董是役也尤所樂為於是
分司之廳不踰月而告成既而邑主簿丁仲安相與子
忠及予舉酒落成其上覽江山之名勝撫景物之清妍
志甚樂焉子忠將還浩溪仲安屬於予曰修弊補廢有
司事也予以專理縣政不得一一於此而責成於子忠

子忠能以予之事為已事可無一言以述其美敢請予
之去家快閣為分司者尚無恙也十餘年歸而快閣但
頽垣廢址蓋已久矣追想昔時悵然興嘆不止於乎快
閣西昌名勝處也宋黃太史庭堅及蘇內翰子瞻諸公
蓋嘗登眺題詠其上至今石刻尤存可以想見其人有
非尋常分司所可比也而可以久壞乎惟陳御史能知
此而丁魏又能副其意皆西昌不朽美事也予故不辭
為序以復丁之請云

孝感堂詩序

廣陵謝涇彥清有奉母之堂名孝感大夫君子為歌詠

之詩凡幾篇其友連檢討景賢以爲此美教化厚風俗之大者求予文述其事以并諸簡景賢予進士同年友而其所重者又如此予何可以固辭景賢告予以彥清舉進士爲翰林庶吉士其丁艱家居也值母病醫藥不可救計無所出乃夜焚香禱於北辰退而割股肉和湯以食母母遂以安其名堂爲孝感以此予竊嘆曰孔子嘗言身體髮膚受之父母不敢毀傷孝之始也涇割股毀傷莫大焉而以爲孝何哉客有從旁應曰吾觀涇於其親之危苟可以得其安雖舍生有不惜况於毀一肢乎孔子論事君當見危致命而天下古今以爲通義不

可易况爲親傷一肢而未必致命乎事君祇致命忠者也忠孝之所推也則涇之刲股爲孝矣予曰子者父母之所遺也則子與父母一體矣豈有腹心有病而傷其股可以安之理耶客曰固無是理然腹心有所不安而手足能獨安耶故手足能不自安然後腹心爲有救况涇愛親之心切有不暇顧此其真有感動於天者客之言亦有理予不必盡難也遂書以爲之序

送獨孤時用還泰和詩序

北京刑部郎中獨孤君樂善吾鄉邑篤實謙和君子人也予少爲邑庠生尤及與君同遊而其謙和篤實之名

已燁然著於行輩間比其舉進士入翰林歷官禮部工部以至於今二十餘年凡士君子之識君者莫不以是稱之無間言焉於乎此非予言實衆人公言也及見其子時用又循循然言動不妄克稱乎君之子則知君之所以持身又有以化於家予觀仕宦子弟之居京師不縱則驕不傲則侈往往七八焉夫豈盡出於其性哉亦父兄者有以縱之然也而君有子不少同於流俗如此信可尚矣歲戊申之六月時用以其父命歸省先塋於鄉臨行請曰願有以見教生將服行焉夫士之所貴者學問足以廣其智仁義足以飾其躬如斯而已然仁

義學問非友不足以成之直諒多聞便辟善柔便佞孔子所謂損益者又不可不擇也習俗移人雖豪傑之士不能免今之驕傲縱侈之習豈獨京師子弟鄉邑殆又有甚焉者可不慎哉可不慎哉子歸其思所以不溺於俗務求益友以充廣夫學問仁義之功則無愧於士矣勉哉時用予之所望亦尊府之意也凡其執友愛時用者各賦詩以爲贈而予爲序之如此云

送陳教授景著序

宣德二年五月予友翰林編修三山陳氏景著以丁外艱服闋至京師將入翰林懼其母孺人無他子侍養且

目迫於衰暮乃言願棄翰林之職乞得近地教官以便朝夕奉母所司爲聞於朝 天子憐而嘉之畀以其鄉邵福州府儒學教授且行公卿大夫與之有翰林夙好者皆樂其願之遂賦詩榮之修撰苗秉彝王孟堅謂予宜爲之序予與景著非獨同舉進士同官而已至於論議趨向亦靡有不相契於其別去固有不釋然者然又豈容已於言乎景著爲人不事外飾而其中獨狷介是非之心皎然明白不肯少徇於人年二十餘即以春秋經中鄉試會試皆在高等廷試遂賜進士及第自官翰林至丁艱十餘歲蹈履之繁無間言焉於今將考績以

有叙陞矣乃棄而就教官此其心豈有他乎哉教官職之卑閒者也雖有安靜之樂而無勢利之榮然則不獨以見景著篤於養親而其志之所存亦可知矣雖然古有之仕而優則學予固亦仕而願學未能者今予質甚美年甚富且居既學之半苟又以其餘力而一於學以廣人之信從將其樂之在已詎有涯哉所以樂其親者有不在於此哉

送胡知縣如騏任任丘序

聖朝既取士於學校又有人才之貢及九載吏部之擢其所以備官使可謂盛矣仁宗皇帝以為不足復詔

百司凡懷材抱藝隱於山林者其具所知以聞於是承
舉薦而來者不絕於道何其盛哉今 聖天子求賢益
切吾邑胡騏如騏以監察御史尹崇高薦至吏部試其
所長名在選列奏爲河間任丘知縣於戲自如騏之去
家不五六月一蹴而至百里之宰固本於 聖朝之用
人無間而亦如騏之才見試於所司者有足尚也人患
不自力耳能自力焉無不達也固有壯游學校而老不
獲沾一命以死且退者謂之盡出於命可乎予於如騏
竊有感焉其之官也鄉邑君子請予序以贈之如騏爲
人謙謹篤實而智識不外著求其言則論議疊疊皆設

施之方也其宰一邑何有夫令於民如父母之於子待之以誠而憂其所憂則民於令如子之於父母樂爲之用雖之死不悔此自然之理也夫父子至親也父苟不慈子非至孝鮮不悖者而况於如父子者乎推此則知民之誠不可以忽也吾聞如騏家居嘗延儒師以教鄉人子弟願學而無貲者又嘗作亭於路以貯往來避風雨之無所歸者其窮所惠於人如此况得二邑爲之者乎以如騏之素惠又用予言行之將來有不大及於民者哉若然則不但不孤崇高之所薦而於聖朝求賢以備官使之意亦可以少副矣勉哉如騏予日望之

送縣丞丘君仲野還泰和序

泰和之民與賦視他邑之煩且富者在其十之四五視其稀且寡者恒十倍之縣亦可謂非小者矣士官於其間者苟有漁取於民之意雖虐取之民不至於甚困有終其任不持一錢去者民亦未嘗見其甚有餘也惟取與否其是非之公論不獨士大夫能不昧下至田夫野老誦說之不置者蓋無間於其去住也然則細民之口固有可信而亦豈不大有可畏者耶近數年來官吾邑者固多而一毫無取於民者吾僅見二人焉以吉安府通判治泰和縣蕭田余君淑眩暨縣丞姑蘇丘君仲野

也余君余舉進士同年老友丘君舊以賢良方正登庸之士雖進用有不同而二人者志同謹合臨財如淵冰忍貧如鐵石則一此余之所親見而嘗詢之田夫野老誦之雖千百人如出一口者也使諸君官有謀猷者皆如二君操持之確其過於人豈不遠耶正統八年春正月朔天下諸司自藩府至州郡皆應 表賀新歲而吾江右選其屬之素端謹者捧緘以行丘君預焉於乎丘君之臨財也尚如淵冰則其於臨事也當何如哉况是行又事當戒謹恐懼之至者耶夫士患操履不慎戒懼不至耳苟慎且至於官無不可任於事無不能理者也不

以丘君之操履戒懼如此誠益守之弗懈將來造詣有
莫之能禦者豈直佐一邑而已哉茲當竣事南還吾邑
之士大夫皆愛重之謂余宜述其美為贈故書余所見
且聞者為之序云

送王訓導中蘊之任荊門州序

嘗聞先叔竹林府君館授陳觀志甫塾時澠江王氏有
數先者數就往還竹林故從海桑陳先生學遂引數先
偕從先生後竹林既出仕數亦舉明經為象山縣儒學
教諭自是王氏仕者相繼予復舉鄉貢為化州學正遷
北京國子監博士伯微奉先亦先後舉鄉貢伯微分教

德慶州敬先亦舉明經分教郴州宜章再遷岳池教諭
嗣先舉進士爲桂平知縣起霖舉賢食任新會縣丞於
今又見吾中蘊焉五六十年之間王氏仕者皆起於儒
如此可不謂之盛乎中蘊名琳尤謙謹而篤實以通經
爲武岡諸生所知聘爲訓導此得命徃分教未幾以
丁艱去服闋改荆門州儒學將之官其姻家刑科給事
中劉誠之求爲序以贈行豈以余於王氏出而仕者皆
有交游之雅相知之悉故耶夫言必求於相知之悉者
則爲言也有實然則余安得辭序哉夫古之爲治者莫
先於教教化行於上則民自從於下矣未有教化不行

而民從其令者故治人者莫如教人用力寡而成功多
也何也夫治人者治一郡一邑則一郡一邑治而已矣
教人者教一郡一邑有成則一郡一邑之賢才散而治
教四方其為治且有成不知其為郡邑幾也教人固愈
於治人矣苟非身為之本而文藝以為用未有能成者
也王氏前後仕者八人而職教者半之若子復與數先
敬先皆有學行而教人有造就者也中蘊所知必又深
且悉過於余則於茲行舍此復何所視法哉若欲等而
上之以為法焉則非所敢量也姑書之以為勸

送叅議吳君亨晦之任淞江布政司序

朝廷建官其所掌蕪於四方者處以要近而抑其品秩
其所職專於一隅者置之䟽遠而豐其祿位蓋抑品秩
者豐其祿位之始而豐祿位者抑其品秩之效觀於以
六科補藩方有足徵矣六科七品職耳四方章奏得以
正其錯失雖六卿大臣無不在所正之內比其滿而選
也豈獨出補藩方而已雖六卿之長貳以至臺憲喉舌
之府奉常廷平之司其正與佐皆得補之而不得以為
僚屬焉其出而補藩方亦往往以內無闕職而外有重
務者然後以行然則六科之膺重寄豈尋常銓注於
援例者所得而擬哉安慶懷寧吳君亨晦在宣德間

即以明經領舉於鄉為第六人既而會試中選廷對
遂舉進士觀政大府有賢能稱聖天子正統之初首
擢為工科給事中小心恭慎逾久不懈數年命掌科
事大得譽於縉紳大夫君子之間蓋又六科中之表表
者也歲之癸亥有言淞江銀場宜得廉公寬簡之士往
視其間庶幾奸弊不作官民盡便公卿大臣預薦舉者
咸謂非吳亨晦其人不可名奏擢為布政司右叅議或
曰亨晦嘗欲薦補六卿副貳之員闕者今以往監銀場
固為大得人矣其如少屈何哉聞者以為君子之仕期
得施其所學以惠利人而已矣初不計其所居之位崇

卑內外何如所學誠能致君於上澤民於下所處雖在
疏遠其為貴且樂莫之能喻也所居雖高且近而所職
者有不稱君子反以為媿使亨晦能不以其所務者為
易而忽怠之非獨有可貴且樂於將來而由遠以遷近
由卑而升高亦在所必至此理之自然也於其拜命
奉璽書之官也其同官友李給事中用初相率屬余
文以為贈余亦重亨晦有素者故舉論薦亨晦之公道
以為言且致願望之意於是行云

送知府易君時中赴成都序

宣宗皇帝恒念民之休戚所係莫踰郡守蓋嘗制詔

吏部非出三品以上薦者不得以任遂著為令所以慎其選也 今天子嗣大寶之初四方奏闕郡守者十有一 詔令廷臣各舉一人於是吏部尚書郭公首薦禮部員外郎易君時中時 宣宗皇帝梓宮在殯尚書胡公方資時中相事而時中乃以薦去留之不可既而公自嘆曰易某豈直資相祠事而已設有大薦又當屬之何人蓋二公之視時中皆如懷中之寶以待售者郭公重為郡得良守胡公重為 朝得賢臣所重不同其心則一於公而已竊嘗以為大臣事君鮮有大於薦賢者也古稱達視所舉予於今日益有以知二公者矣時中

既擢成都知府尚書胡公侍郎章公謂予宜有言以光榮其行予曰嗟乎士能為邦家之光閭里之榮者賴

聖朝之寵命與明公之知薦斯二者足以光榮於無窮也奚待言而後然耶然予進不容以辭於二公退不可以薄於二公時中不容自默也古之君子誦詩書以為言修仁義以為業其孰不欲得志於時領明公之薦受聖朝之命是得志之時也苟得志矣而澤不加於民君子以為猶不得志郡守古之諸侯澤足以加於民莫要焉夫一民之情有所未知一事之利害有所未喻皆足以為施澤之累是故虛已以聽民則不壅而明忘已以

察事則不偏而審如是而後施澤於民民其有不被之者耶以吾時中之才之美其何難於此者時中誠無負於郭公所舉則於胡公欲留之意有不遂於他日也耶時中世家表之萬載與予同舉乙未進士而自行人遷任禮部為人溫雅端慎居官從容有為蓋嘗蒙恩贈二親以其職尤足以徵其材賢云

贈大理左少卿程公文質序

今天子嗣大位之初江西民有阻於饑者自作不靖於大盤山將窺視郡邑以為害時新安程公以監察御史巡按十有三郡朝廷方發兵以討寇程公先事辟守

禦者而資助於鄉丁得吉安之永豐撫州之樂安臨江
之新淦凡三縣之人而擇其吏之有為者以佐指揮公
領其綱一舉而取平之於是兵不加境而郡縣咸得安
輯焉事聞即拜程公為大理左少卿於江右是歲秋程
公始得代還遂掌大理事監察御史按治外服凡其吏
之貪懦民之休戚利弊與夫風俗美惡事勢緩急皆所
當知知無不言言無不行盡是數者固為不易得矣况
於禦大災而捍大患耶若程公者可謂百數十中一人
而已宜乎其膺 榮命衆人所未嘗有之也其視事於
大理也其鄉士君子之在京師者莫不為程公榮相與

屬文於余為贈江右余鄉郡也頃自鄉郡來者無間君
子細民皆譽程公善政如出一口則予所謂不易得者
無不有之又不獨禦大災捍大患而已也古人於凡能
禦大災能捍大患之人宜有不窮之報而余之於程公
當亦表著其美庶幾乎古人之意也大理古之廷尉天
下獄寃資以平者也人之大災大患又孰有大於獄之
寃誠推向之禦大災與捍大患之心加於平獄則其獲
報之隆又豈特在於其躬而已耶古之于公可以徵矣
故於贈言之請并書以為薦云

送邵武府經歷梁叔蒙詩序

二十年前叔蒙與同產弟叔車並舉永樂丁酉江西鄉薦叔蒙為第四人蓋春秋之魁也是時叔蒙泊菴先生為翰林侍讀兼春坊贊善叔本之為納教諭從叔挹之已舉進士一門仕者衆矣兄弟遂相引退以儒為業或進其所不及其後泊菴先生物故本之自教諭遷西藩紀善挹之自進士擢主事即中父之亦相繼沒於是叔蒙叔車與弟叔濟暨本之子叔莊相與嘆曰先世仕宦不可不繼而况遭逢熙明之世也哉叔莊首舉明經得補鄉校訓導叔車繼舉丙辰進士叔蒙舉賢良方正叔濟舉文學才行梁氏一門仕者復彬彬乎盛矣嗟

乎士之進退出處固各有命而亦莫不各有其時惟能
安命以待乎時斯可以為君子世之人欲違命與時而
妄有所異焉不得不以咎已而以咎人可謂之君子乎
此予於梁氏兄弟所為獨有取也歟叔蒙之擢邵武經
歷縉紳交游之士皆賦詩以贈行而謂予宜序以引之
獨念循發蒙時泊菴為里塾師或以故去則其尊府畦
樂先生輒來署焉先君奉師之禮甚隆先生愛循之意
甚厚其後泊菴考禮部試余與梔之皆在所選忝同朝
者數年而與泊菴又忝同官益見親厚比余考禮部試
叔車亦裒然在舉列且相與無不相善者則於叔蒙之

行而忍以無言耶夫欲以有言者苟無愛顧之意存焉則亦徒言而已君子之所以愛人者莫大於德叔蒙泰和䟽達勤敏士也誠益謹以持身而思惠以及人則德為有光於其先與鄉邑之交游者矣於是乎言

贈監察御史方君懋德序

新安方君懋德既舉進士之二十有三年為正統二年始自太常博士用薦轉為監察御史太常博士監察御史其秩等也太常職有事於郊廟百神之祀博士尤清而有文翰之典非其他所可擬御史則司憲紀以肅百職激濁揚清於內外此二職固皆處乎清要不可高

下而懋德乃由博士用薦轉御史以為榮乎非耶頃者
監察御史難於得人新進初任之士率不預選必得練
習敏通大體而識事情者然後廷臣薦而用之由此
觀之懋德由博士轉御史官無所增益其應得人之舉
為榮大矣或謂與懋德同舉進士者徃徃有任方岳列
鄉佐者蓋非一人非一日矣而懋德獨積累僅至於此
是何滯也余曰君子不以其進之速為貴而以其成之
固為美譬之為山積之也漸築之也密不計其歲月之
多惟戒其成就之驟如是則雖至於九仞之高蟻封之
所不能入淫雨之所不能夷可以永存而無替矣懋德

自舉進士為翰林庶吉士凡若干歲自庶吉士為太常
博士又若干歲於夫學優而仕仕優而學懋德服之已
有素矣且清慎而有文學為上官所稱其有成於方來
如山之極其高又豈蟻封涪兩之所得而侵哉於其轉
御史也其交游之厚者相與推刑部楊主事寧求文於
余為贈余與懋德同舉進士故知其詳為序之不辭云

劉氏考妣輓詩序

正統十一年十二月二十九日贈徵仕郎行人司左司
副永新劉允恭先生之配太孺人文氏卒於家自其生
至此年已九十矣明年閏四月其子監察御史克彥聞

計將請於 朝歸治喪葬以余同郡乃奉 朝大夫士
所為司副與太孺人輓詩來請為序首簡蓋司副沒於
今二十有六年矣而太孺人歲亦登于耄耄尚能使人
哀之至形於詩非有德譽之盛不能及此夫豈世之有
才而不得其年者使人傷悼之可比耶竊嘗求之司副
與太孺人所以見哀於人之實蓋司副性至孝元季奉
父避難山中或得一食之美必留奉父而自采藤實以
療饑時平父沒一見藤實輒思其父悲泣不已歲時奉
先薦享之外更設其親平生所嗜曰庶幾少娛吾親也
嘗夜獲竊魚盜訊之乃恩人子即釋不以語人里有穿

踰盜其家器物者旣而究知其人乃於已有瓜葛之親
曰吾寧忍發以辱其世乎數年盜以所竊銀器私鬻與
人為怨家增直市以告司副欲假以報怨司副佯曰非
吾家之物其長厚如此太孺人自幼喜讀書好聞古孝
子節婦事未歸事寡母克孝旣歸奉舅姑以禮鄰有窘
於索負欲自盡者太孺人憫其死出貲代償所負卒不
責報每遇饑貧輒出有餘以濟其急無間戚疏德之不
置而尤篤於相夫教子克彥以明經舉進士以至今官
不辱太孺人預有善教焉司副與太孺人所以得受
命書贈封官秩如其子者皆在此也豈獨足以得哀輓

於朝大夫士而已於乎為善之報獲於生存而益著於身後余於司副與太孺人見之故為序是詩也并書以勸夫來者云

慶曾母趙氏壽七十序

吾泰和城西秀溪之上有曾氏其先徙自邑千秋鄉之龍徑西湖里有曰仁道甫者以忠厚見稱於鄉族余嘗識其長子淞江按察僉事克偉交其仲子克庸皆能世其父所以稱於鄉族者克庸常遣其子今富順縣儒學教諭衡秉鈞者從余受經愛其獨狷介卓卓在倫輩知其為有所承而然也今年克庸從子潛江主簿秉德以

職事被誑誤至京而其叔正己之子曰秉玉者匍匐扶
持調護而來如於其所從出雖備勞苦不厭余以是益
信曾氏之忠厚不獨一世一人而已孰非有所承而然
耶秉德得白秉玉辭歸奉養其母走告余曰秉玉不幸
少孤賴母趙氏教育至有成立茲母幸獲歲周七十初
度在邇願得一言歸以為壽幸莫大焉其請至於六七
不倦且曰秉玉先祖妣出先生陳氏言幸不吝余因嘆
曰秉玉不遠千里為從兄尚若此知其為母當何如也
遂不辭而為之序曰孔子謂仁者壽蓋以壽為仁者之
效也今觀曾氏連世皆以忠厚相承自其祖孫以至兄

弟忠厚無間忠厚非仁者乎秉玉欲為其母之壽亦惟
培養乎此而已誠勉力培養之不倦將不獨足為母之
壽而曾氏之流慶益遠而無窮矣秉玉其尚思所以副
余言可也

贈孝子胡大年序

孔子曰人之行莫大於孝有子以孝弟為行仁之本誠
以父兮生我母兮鞠我無父何怙無母何恃此恩德之
施於我者所為莫大於父與母而我之報於父母者所
為莫大於孝則孝豈非為百行之所當先乎譬之於水
必先濬治其源其源既深由是引導而為溪澗雖千流

萬派其達於遠也可立而待矣譬之於木必先培植其
本其本既厚由是發生而為枝幹雖千條萬緒其臻於
高也可坐而致矣人能善事父母以成夫孝之大猶於
水能濬治其源木能培植其本則凡四端五典莫不由
之而生百行萬善莫不由之而出內而修身齊家外而
事君事長化民成俗何往而非此道之推乎所謂本立
而道生者此也此君子所為惓惓篤於孝也淮西舒城
有敦行之士曰胡紀大年者自少已有志於顯揚其親
曰事親而不能盡此道不足為孝乃肆力於問學日以
登庸為心數年遂自太學生釋褐擢吏部文選主事吏

部銓衡人物之所而文選其首屬以大年為主事其為
選擇而使之也可知正統七年蒙 朝廷推恩以大年
之官封其父仕廉甫母妻皆為安人此又足見大年克
稱任使有以遂其志也仕廉甫既受封因來謝 恩闕
下得疾而卒大年奉柩歸葬於鄉痛其養之不終乃結
廬居於墓側朝夕哭奠飲食如事其生而終喪未嘗近
葷酒嘗有鹿群環鳴於墓去來不驚人以為其孝誠所
感既而有司為上其事 詔旌表其門曰孝行之門時
大年以官滿九載遷貢外郎仍任文選 恩命並下凡
其鄉郡之士仕京師者相與推通政司叅議湯君來求

贈以言士之生也登庸於時固難而能得旌異於當時
尤難得登庸有道能自力於已斯得登庸矣得旌異有
道能篤孝於親斯得旌異矣誠又推是二者以效忠於
國家而不替焉將見登庸旌異之來有莫之能禦者豈
特如今日而已哉勉哉大年以副余與鄉郡君子之所
期望者可也

張氏半村居詩序

會稽張君友讓其先本合肥人宋有諱岳者以武職扈
高宗南遷始家於會稽之勇樂村以村舊有張姓而懼
其相混也遂自名所居曰余貴鄉以別之鄉人因稱為

余貴張而稱故姓曰勇樂張自岳至友讓十世矣村中
居者止二族友讓以居得其半也又距郡城半舍而近
介乎村郭之間因名其所居曰半村環而求之曹娥錢
清二水出其東西而合流於其北以入於海會稽秦望
禹穴南鎮雲門若耶諸山列峙其南相高並秀可望而
盡蓋張氏之居雖得乎村之半而名勝之在山川者覽
之無不得也其可樂為何如又嘗以謂平原野水之耕
釣長林邃谷之遊翫此窮者之所樂而達官貴人不與
焉周旋乎冠紳之間居處乎堂階之上則達者之所榮
而田夫野叟莫及也友讓介乎村郭之間以居雖進退

處窮達之際蓋有超然獨得於其外者其以半村名居
豈徒然哉友讓為人庶直且灑然無塵俗之氣亦時見
之於翰墨間有可嘉者間以材舉至京將得官矣尤以
所謂半村居者求歌詠其山川之美於士君子孜孜不
倦其有得於窮達之外非耶夫仕溺於富貴與窮果於
忘世皆非得時中之道也若友讓之退非獨善進非忘
返其庶幾可與言此矣因閱夫歌詠之富也為之序于
其首簡云

送楚英上人序

學於佛者有三被於身為律說於口為法行於心為禪

其為書奚啻數千萬餘言而其大指不過欲人舍惡而趨於善而已自世之學佛者以為其道在於屠割烹灼以苦其身茹淡含辛以瘖其口禁絕念慮以死其心否則奔走卑辱以崇飾塔廟為務然膏薰香以敬禮其師如坐誦其書至百千萬遍以為可以弭禍成福或又攝衣升坐為不可知之說以相問答視通塞為勝負要其師之舍惡趨善之意固如是而已哉誠使正行順履而非善不為慎乃出辭而非善不道怡神靜慮而非善不入於心則其所以被於身說於口行於心者何往而非律非法非禪哉此學佛之得者質之吾儒孔子所謂非

禮勿動非禮勿言思無邪者是也佛以直指人心見性而成猶吾儒者存心養性事天之意要之舍惡趨善皆本於心豈待求諸外哉上人楚英嘗以佛學為其徒之表率又矣今年又用薦者得佳持于嘉禾之精嚴寺其素所交游者今欽天監五官靈臺郎潘緝熙屬予序以為贈楚英謹持戒律者也茲又將表率其徒於一郡故予取其師之大指有近於理道者告之使之相與勉焉

送鄒尚友還五雲詩序

五雲鄒君尚友自舉進士歷官至今幾三十年大夫士之久於朝者多能識之且道其為君子人也今亦老且

病矣會 聖天子寬恤之詔再下仕者許以此請放歸

田里於是君以澧州守來考績遂得請焉朝士君子之
相厚者皆為之喜且惜其超然獨去也有網繆不忍釋
之意相與酌酒飲餞都門之外而賦詩以寓意中書舍
人劉長謙鍾子勤以屬予為之序鍾劉及予皆君同郡
而鍾劉又嘗與君同官又則屬且序豈不宜哉君事

太祖高皇帝為中書舍人今少保戶部尚書武英殿大
學士黃公宗豫亦君之故寅友既而君改知縣遂官澧
州凡君所至輒平易以近民雖無赫赫之威而民畏之
愛之又不得論可知則謂其為君子人者豈過譽哉而

於其歸為之喜者亦豈以其惠之將不加於民哉以其
得休老病於家而無所繫累於已耳此愛鄒君者之私
情而非愛民者之本意也今之守令不驕則侈不貪則
懦求能如鄒君之長民蓋不多矣於乎安得鄒君復出
以庇利夫一州一邑如昔日邪予於其歸竊有感焉而
特於此發之

送劉嘉會還廬陵詩序

廬陵劉君嘉會既罷官歸之若干歲監察御史尹崇高
復薦於朝詔徵至而君春秋已幾八十自以旦夕益
迫衰暮不足以勝任使嚬懇乞骸骨歸天子憐而畀

之時宣德戊申二月丁丑也介行鄉郡士夫君子在京師者莫不重其可用而惜其年之邁且喜其得請也相與賦詩送之而授首簡於予為序夫士四十強而仕大夫七十而致事禮也有位者七十已優老况於八十而未有位者乎劉君今日之歸有足以見聖朝處人君子自處其皆由於禮矣則所以喜者非為一人之私也初君以明經舉授壽州儒學訓導教諸生必傾竭底衷一時賴之以有成者甚衆旣而以建言合上旨陞常之武進丞武進今大宗伯胡公之鄉邑也夙號難治君至官待人以誠而民多悅從不見有難治者故今被

召命而來也深見禮於胡公公一見之即曰此吾邑故
賢貳尹也亦未嘗不重其可用而惜其年之邁比其得
請歸也亦未嘗不為之喜焉於乎此可以徵其素履矣
君少從學於吾泰和海桑先生陳公自餘諸老先生皆
及親炙至今接談之頃尤能歷道前數十年之事則其
所以得譽於鄉邦者其無所由然耶海桑先生教君以
有今日則君之歸師表後進容不猶海桑耶豈獨逍遙
泉石以樂其餘齡而已也敢書以為贈行詩序

贈李行人考績詩序

宣德三年四月八日予友行人李泉子淵以居官滿九

載將考績赴吏部其同門友進士張純監生吳真相率
素所厚者賦詩以為之榮而具首簡於予屬為之序夫
張進士之所為屬予者其豈無由然耶方予領鄉薦赴
春官於北京時實與子淵及其鄉邑五六人者偕行數
千里內風霜冰雪之際舟中斗酒相聚相歡好如平生
比至予既忝舉進士而子淵之五六人者亦裒然於榜
中其後或列六卿之屬或掌奉使於朝或寄民社於外
而皆有賢譽在人之口耳固不可謂之不盛矣然今十
餘年來而尤同在朝者則無幾人獨余與子淵尚如舊
近又得張亦以舉進士至而三人者追憶往時相好之

舊或存或否不能不有感於中矣子淵茲又將有不次之擢內外既不可知又安知夫晤散之何如哉此予所為益有感也然則張進士之所以屬予文者固有深意而予亦得以寫其懷抱焉子淵為人篤實而謙謹好文而樂義居官惟以敬職為本隨所寓事不以難易險夷有所避就其立朝與奉使於四方無愚賢不肖皆知其為君子人不肯少有欺慢之心而子淵亦不矯不屈有足以稱夫任使者其考績於天官有不得夫善最之書也哉於乎予之同年進士三百有五十人任京官者什之七八而子淵之儒素尤予所敬重者聞其尊府好善

業儒其所自来遠矣故併為書以見子淵之非偶然者
焉

送封監察御史嚴仲恭還分宜序

仁宗皇帝踐阼之後即大舉推恩之典在朝臣故朝臣
之稱所職者皆得受封贈其先代有差今 聖天子之
嗣大位蒙 恩典者蓋尤厚焉袁之分宜嚴氏孟衡初
以進士擢為監察御史居官出入焯有名稱在是其尊
府仲恭甫得受封以孟衡之官而母亦受封為孺人誠
聖朝之盛典斯文之榮遇也仲恭甫既受勅褒衣博帶
蒼顏白髮光輝照耀乎閭里間蓋不勝其感激之至情

矣乃躍然促裝就道不遠數千里來拜俯於闕下用
申其感激之情焉會孟衡按滄自蜀還遂得掖隨仲恭
甫以出入禁闕天子之間榮名盛福兼有於當時即人
生之至幸復有加於此哉嗟乎仕於朝者衆矣天子
推恩得以及其親者固亦不少而其中有幸不幸之間
焉或父存而母沒或母存而父沒甚至有父母俱亡者
雖蒙恩典隆盛而不得顯其親於當時矣此其謂之
不幸非耶求如吾孟衡之父母無恙以有今日蓋什伯
中之一二耳何其樂哉其視世之父母雖存而未嘗沾
一命以徒老於家者則又不可同日語也此予所為獨

美仲恭甫也仲恭甫歸分宜其鄉士友之在京者介行人易時中來求文以道其榮遇予與孟衡及易皆同年舉進士而孟衡有尊府如此予安得不為之樂道哉在是乎序

壽劉君廣泰春秋六十詩序

吾郡五雲邑有東禮蹈義之士曰劉君廣泰者今都察院左副都御史廣衡君伯兄也以景泰三年九月某日春秋周六十廣衡君竊念其始孤時兄弟五人伯兄年方十四季弟廣嵩才及三歲內無彊而有力可恃之親外有徭賦供輸難勝之事憐念之者雖多而幸其失墜

者亦未嘗少上賴伯兄勉於植立不辭險艱匪但畢務
於公私兼以周庇於弟妹迄今四十餘年兄弟且在聚
食二十餘指內外長少庭無間言使先世之業幾墜而
後振已又得已肆力於學進取顯榮自秋官屬佐長又
藩憲以至贊理都臺凡此何莫非伯兄之力也今兄幸
際六十初度之辰而已拘於官守不得躬拜左右稱觴
為壽此心之歎殆惓惓於朝夕而未已焉乃求朝之縉
紳大夫作詩以申祝願之情而以首簡屬為之序余亦
幼孤賴兄之力得以不墜而有成者則於廣衡君之所
以為懷能不無所同於中哉此余所為樂為之言而不

敢有辭也劉氏世為五雲名族其先本河南祥符人宋
季有為萬安丞後遂居縣城西之橫街里為萬安人子
孫衆盛占里之半邑人因稱為劉半街于以見其先世
積累之盛之所致也使其非有賢者之衆則雖盡有斯
里而無其他一人間之人將指而譏之不暇安在其有
善稱若今日哉然劉氏不獨稱善族廣泰君不獨稱賢
兄余聞其居鄉邑泊然自守而惟教子孫以事詩書課
童僕以躬耕鑿雖居城郭且有弟在勢要未嘗自恃以
有干於郡邑長貳而或為之媿媿此余所為重其秉禮
蹈義而非其他為父兄者之可比也於乎誠如是而不

憐將其名譽之著壽福之隆詎止於斯而已因序其祝壽詩并致期望之意如右

救荒活民書補遺序

孟子謂人皆有不忍人之心惟聖人全體此心故其所行無非不忍人之政觀於聖朝救荒之舉有足徵矣江陰朱熊維吉嘗出粟千石以助有司賑饑蒙朝廷賜璽書旌其義矣既而愧其所出以助賑者不廣復取宋從政卽董煟所纂述救荒活民書補其遺逸鋟梓以行於世冀有以助行不忍人之政者之萬一其又非所謂上有好者下必有甚焉者歟嘗觀七八月之間旱油

然作雲沛然下雨人知蒙澤潤於天矣而不知雲山川
之氣所蒸雨溪澗之水所升輸小以成大也出泰華之
產發江海之藏人知受惠利於地矣而不知泰華江海
由於涓埃之積資約以成博也朱氏欲有助於行不忍
人之政其猶山川溪澗之輸於天涓埃之資於地者乎
况是書有古昔聖賢暨我國家仁民之意載諸訓典
者在惡得不足以弘其所濟耶在典牧者用之惟其宜
耳熊有孝行見稱於鄉其所以惓惓於義者孰非是心
之推間以書補遺求余序故為之書

長樂曹氏家教序

閩之長樂有篤實之君子曰曹君叔善者余舉進士同年友也自舉進士以被選為太常博士改順德府儒學教授前後幾三十年既畢其所職矣念其子姓家居固務誦詩書以為言修仁義以為業然懼其或有未易入德者乃酌古今人所嘗行之事無間雅俗苟有合於人情宜於上風而順適乎天理之本然者為數十條合為一編其中大而治心養性承先裕後微而飲食動息即吉避凶與凡應事接物之方靡所不有名曰曹氏家教將以示為其曹氏者使之守而行之以駸駸於善道其裕後之心亦篤矣今年自順德以歲滿來考績于京師

遷廣東高州府儒學間出是編求為之序夫惟教於家者一於深雅則中人以下不能仰而企一於淺俗則中人以上無所引而進是編有雅有俗用其雅深固可以造於遠大用其俗淺亦不失為鄉善人其立法之意亦良矣余嘗求之叔善其在太常致慎以持身秉虔以相祀自卿佐而下咸賴之有濟比官順德汲汲以誨諸生為務諸生被其誨者不獨邃於經訓而於行已應務徃徃不外乎其所以教於家者於乎夫豈徒能言之而不能行者之可少同耶為曹氏之子姓誠以叔善所行所言而力勉之於身何憂患之能于而何德善之難成也

叔善名賢蓋曹宗之表表者云

送楊允嘉還建寧序

允嘉名某太子少保工部尚書兼 謹身殿大學士建
安楊公之次子其來侍父京師數年縉紳老成謹飭舉
望君子皆見親接而愛重之其他澆浮鄙艷之流不獨
不識而亦未嘗及一見焉於乎此可以知允嘉之為人
矣京師人物之淵海也卿大夫之子弟居者非閑家教
與絕外慕鮮不惑於流俗甚至恃勢肆為非義不淫溢
及禍不止使其父兄亦得 君如楊公其又當何如耶
公以儒彥歷事 四聖見信任在公卿之右於今已三

十年顧允嘉為之子如此其賢於人遠甚而亦足以見公之能教矣歲之己酉允嘉將奉父命南還省母且畢有室之願而戀戀懷不忍去意交厚善者謂予宜有以慰勉之夫愛親在順乎親之志也公之所以教允嘉者豈有外於飭行修業光顯其身以不忝其世哉省躬以防其過務學以益其知致慎以終其美斯三者足以順乎親之志順親之志顧不由己乎此允嘉所宜盡心也允嘉閑家教有素固無俟予言而予素辱愛厚於公且有贈言之責舍此其何以相告哉允嘉秀偉而端厚志高才敏讀書屬文已駸駸然有進誠不鄙余言而益勉

將所造執之能禦耶如是而後稱為公之後也予敢以
為允嘉言之允嘉其以質之尊府何如

送劉副使士皆任廣東按察司序

宣德戊申之冬予友劉咸士皆以歷四川河南兩按察
司僉事滿九載來考績于京師會 朝廷選大臣肅清
風紀四方憲臣考績至者率不得苟書最而士皆以在
書最列明年吏部上績遷補河南按察副使未行其前
任者坐事得釋應復舊職 詔改士皆任於廣東介行
工部郎中蕭君養高太常博士楊顥希淳求諸縉紳君
子歌以送之而授首簡屬予為序竊惟 國朝自洪武

中到今吾邑之士任憲職者不為少矣而為按察副使財四人焉四人之中三出於劉槎翁先生子高子敏其一則士皆也雖非時同而可謂劉氏盛矣初槎翁先生以宏材與學事太祖高皇帝由職方遷北平氣和而

內實剛行潔而政實恕皎然如白璧之無瑕溫然其德惠之可即先輩君子之巨擘也其流風餘韻在人者至於今尤彰彰不衰於乎不有作於前固無以視法於後不有繼於後又何以儷美於前予與士皆鄉之後輩而知先生者有志之士尤欲求其所未聞且遠者而私淑焉况先生吾所已知而近者舍之而他求豈好善有誠

者執士皆舉進士贊憲兩藩固已有賢譽於時矣今為
按察副使而與先輩巨擘實同則予欲有言於其行非
舉此不可也不然則道在邇而求諸遠豈忠告之謂哉
雖然予之斯言非空言也誠不鄙而取之將其流譽自
有以追配於先生者矣士皆茲行又得便道過家躬捧
命書以為親榮以遂其平生之至願為樂可勝道哉因
併書以為詩序云

送知府白瑩中還紹興詩序

正統十三年春天下諸司皆來上計京師蓋自京畿有
司以至鹽馬之吏自外藩憲以及州縣之官不下千數

百人其間有賢有否有勤有惰有得其民之心如慈父
母之施愛於子有失其下之望亦如暴虎狼之致恨於
人者焉然何足以知之賢而勤者得 賜璽書褒諭定
以榮於無窮其不賢而惰者見付有司罷黜足以辱其
平生又有得其民之心者民愛之如父母或求遷其秩
於 朝廷或求詠其德於君子所以願望之者無所不
至失其下之望者人惡之如虎狼或相與訴其罪於官
或相與彰其惡於外所以驅逐之者無所不為士之仕
也果何以得此於人哉傳曰禍福無不自已求之觀於
此可見矣陝之漢中有磊落傑出之士曰白瑩中者其

殆所謂得民之心者歟瑩中名王自太學生釋褐擢掾
江台州府通判繼調任紹州府兩郡人士仕及有事於
京師者甚衆然其相與稱譽瑩中之善政者如出一口
以謂郡當凋弊之餘而得瑩中佐理其間為患者除為
利者興為惡者有所懼為善者有所賴故其去台而調
越也台民乞還之者如子之望父母官滿而去越也越
民乞遷為郡守者亦如台民之望其留不獨求遷其秩
於朝廷如前日而又求詠其德於君子如今日者焉
則謂非其自己求之之福而何蓋瑩中能以越民請得
為其郡知府比來士計而遷紹興人士又求遷紳之士

芳洲文集 卷之四
作詩以詠其美此余之所以云然也詩凡幾篇今濬縣
丞魏瑤又以郡人之意請為之序余故樂為之書使人
知瑩中之非可以易得也

芳洲文集卷之四